



Godina XI
Utorak, 27. februara 2007. godine

Broj
13

Na osnovu člana 252. stav (1), tačka 9), a u vezi sa članom 170. stav (3) Zakona o osnovama sigurnosti saobraćaja na putevima u Bosni i Hercegovini ("Službeni glasnik BiH", broj 6/06), ministar komunikacija i prometa Bosne i Hercegovine, u saradnji sa tijelima nadležnim za unutrašnje poslove, donosi

PRAVILNIK

O SAOBRAĆAJU U ZIMSKIM UVJETIMA

Član 1.

(Predmet Pravilnika)

Ovim Pravilnikom uređuje se odvijanje saobraćaja u zimskim uvjetima, period u kojem je obavezno posjedovanje potrebne opreme, neophodna oprema za saobraćaj u zimskim uvjetima, određena ograničenja za saobraćaj i način informiranja o stanju na putevima u zimskom periodu.

Član 2.

(Definicija zimskih uvjeta)

Pod zimskim uvjetima saobraćaja na putevima smatra se postojanje najmanje jedne od sljedećih situacija:

- a) kada pada snijeg i hvata se na kolovozu puta,
- b) kada na većoj površini kolovoza ima ostataka ugaženog i sleđenog snijega,
- c) kada pada kiša i ledi se na kolovozu ili
- d) kada je kolovoz zaleđen.

Član 3.

(Održavanje saobraćaja u zimskim uvjetima)

(1) Za vrijeme zimskih uvjeta, na putevima se zabranjuje saobraćaj motornim i priključnim vozilima koja u vožnji ne koriste zimsku opremu, propisanu članom 4. ovog Pravilnika.

(2) Za vrijeme zimskih uvjeta zabranjuje se saobraćaj priključnim vozilima na planinskim prijevojmima do stvaranja uvjeta za sigurno odvijanje saobraćaja ovoj kategoriji motornih vozila.

(3) Autobusi i teretna vozila moraju na pogonskim točkovima koristiti lance na planinskim prijevojmima u slučaju iz člana 2. ovog Pravilnika.

(4) Pod planinskim prijevojem podrazumijeva se područje kroz koje prolazi put na nadmorskoj visini većoj od 700 m.

Član 4.

(Oprema za saobraćaj u zimskim uvjetima)

(1) U periodu od 15. novembra tekuće do 15. aprila naredne godine, bez obzira na vremenske uvjete, sva motorna vozila moraju imati odgovarajuću zimsku opremu i moraju je koristiti u uvjetima iz člana 2. ovog Pravilnika.

(2) Pod zimskom opremom koju treba da imaju motorna vozila u zimskim uvjetima, smatra se:

a) Za putnička motorna vozila i ostala motorna vozila čija najveća dozvoljena masa nije veća od 3.500 kg i nemaju više od 8 sjedišta:

1) zimski pneumatici na sva četiri točka. Zimska guma (pneumatik) je na svom boku označena slijedećim oznakama: MS, M+S ili M&S i znakom snježne pahuljice na stiliziranom obrisu planine s tri vrha, čija dubina gazećeg sloja po dubini iznosi najmanje 4 mm,

2) gume sa ljetnim profilom čija dubina gazećeg sloja iznosi minimum 4 mm i u priboru odgovarajući lanci koji se postavljaju na pogonskim točkovima u slučaju zimskih uvjeta.

b) Za motorna vozila čija najveća dozvoljena masa prijelazi 3.500 kg i autobuse:

1) zimski pneumatici na pogonskim točkovima. Zimska guma (pneumatik) je na svom boku označena slijedećim oznakama: MS, M+S ili M&S i znakom snježne pahuljice na stiliziranom obrisu planine s tri vrha, čija dubina gazećeg sloja po dubini iznosi najmanje 4 mm, a pod zimskom opremom za ova vozila podrazumijevaju se još i lanci za snijeg i priručni alat (lopata, vreća pijeska od 25 do 50 kg),

2) gume sa ljetnim profilom čija dubina gazećeg sloja po dubini iznosi minimum 4 mm i u priboru lanci koji se postavljaju na pogonskim točkovima u slučaju zimskih uvjetima, a pod zimskom opremom za ova vozila podrazumijevaju se još i priručni alat (lopata, vreća pijeska od 25 do 50 kg).

Član 5.

(Zabrana upotrebe neodgovarajućih pneumatika)

(1) Na vozilima se ne smiju postavljati pneumatici sa ugrađenim ekserima.

(2) Na istoj osovini vozila, pneumatici moraju biti jednaki po profilu, konstrukciji i po vrsti gazećeg sloja.

Član 6.

(Obaveza čišćenja vozila)

Na motornim i priključnim vozilima ne smije biti snijega ili leda koji bi mogli utjecati na ponašanje vozila, odnosno preglednost vozača.

Član 7.

(Privremena zabrana ili ograničenje saobraćaja)

(1) U slučaju obimnijih snježnih padavina, većih nanosa, smetova ili pojave poledice nadležna tijela za unutrašnje poslove zatražit će od nadležnog tijela za saobraćaj da privremeno zabrani ili ograniči saobraćaj za sva vozila ili za pojedine vrste vozila na određenoj dionici puta.

(2) Izuzetno od stava (1) ovog člana, tijelo nadležno za reguliranje saobraćaja može na licu mjesta privremeno zabraniti saobraćaj određenoj kategoriji vozila dok se ne steknu uvjeti za sigurno odvijanje saobraćaja.

(3) O privremenoj zabrani ili ograničenju saobraćaja, učesnici u saobraćaju će bez odlaganja biti upoznati putem sredstava javnog informiranja i postavljenom saobraćajnom signalizacijom.

Član 8.

(Formiranje štaba zimske službe i zadaci štaba)

(1) Nadležno ministarstvo saobraćaja dužno je formirati štab zimske službe u čijem sastavu treba da budu uključeni predstavnici organa nadležnih za saobraćaj, organa unutrašnjih poslova, organizacija koje upravljaju putevima, poduzeća za održavanje puteva i auto moto klubova.

(2) Zadatak štaba je da utvrdi uzroke koji dovode do ograničenja u odvijanju saobraćaja i predloži mjere za što brže otklanjanje uzroka i stvaranja uvjeta za neometano odvijanje saobraćaja.

(3) Štab se formira prije početka zimskog perioda, a istim rukovodi predstavnik organa nadležnog za saobraćaj.

Član 9.

(Prestanak primjene propisa)

Na dan donošenja ovog Pravilnika prestaju da važe pravilnici koji se odnose na pitanja regulirana ovim Pravilnikom.

Član 10.

(Objavljivanje i stupanje na snagu)

Ovaj Pravilnik stupa na snagu osmog dana od dana objave u "Službenom glasniku BiH", a objavljuje se i u službenim glasilima entiteta i Brčko Distrikta Bosne i Hercegovine.

Broj 01-02-2-328-6/07
2. februara 2007. godine
Sarajevo
